



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 10



Afghanistan tensa ajanga India mejungi kongshitsü

National Boxing Championships: Sachin-i Gaurav tsükdaksü



VOL. XVIII NO. 336 (ADOK 336) DIMAPUR

KÜPTOKNÜ (SATURDAY)

RONGJUI (SEPTEMBER) 18, 2021

₹ 5.00

Prof Jagdish Mukhi-i Nagaland Governor inyaker



Excise & Taxation aser Higher Education mapatem ketdangüsü inyakogo.

Prof. Jagdish Mukhi-i Delhi nung mapa tajung inyakbatem rongnung 1994 kum lottery trade noktangba ka lir. Iba ya pai Finance minister inyakdang liasü.

Paisa nübertem dang yi majemtsü ayongzüka mapa inyak. Prof. Jagdish-i Excise Minister inyakdang dry days teimtiba sangdonga liasü.

Delhi nung pai Higher Education minister inyakdang Guru Gobind Singh Indraprastha University lapokba nung shilem tulu agia liasü.

Pa nem linük nung Finance minister tajungtiba sempet agütsüogo aser Delhi Vidhan Sabha nung MLA award anaben tashi agizükogo.

"India President aser Prime Minister nati kü nem iba maongka agütsüba atema pelar. Tanü nungi tenzüka ni Nagaland nung nübertem bendanga agüja tenzüksü" ta tanü Nagaland Governor, Prof Jagdish Mukhi-i ashi.

Küm aika tejakdang Tsüngremi kü nem Nagaland den metetteptsü maongka agütsü aser iba mapang nungi ni tesentaktep akangshia arur. Nagaland nung alirtemi kü dang temeim sayuba aser keta asenba atema ni kanga pelar.

(Maneni tapak 10 nung...)

Dimapur, September 17, 2021 (TYO): Assam Governor, Prof Jagdish Mukhi-i Nagaland nung Governor 20 buba inyaktsü atema tezüngzüktep agiogo.

September 17, 2021 nü Dr. Imkongliba Ao Hall, Raj Bhavan Kohima nung Gauhati High Court Kohima Bench, Justice S Serto-pa nem tezüngzüktep agidaksü.

Iba sentong nung Nagaland Chief Minister, Deputy Chief Minister, NLA Speaker, minister tem aser state o centre sorkar ketdangsurtem aden.

Sentong nung Nagaland Chief Secretary, J Alam, IAS-i Governor- designate nungi temelaba meshiba sülen Warrant of Appointment zünga metetdaksü.

Raj Bhavan courtyard nung 10th IR Battalion-i Nagaland Governor Prof Jagdish Mukhi nem Rashtriya Salute agütsü.

Assam nung Governor meinyakdang Prof. Jagdish Mukhi-i Andaman and Nicobar Islands nung Lieutenant Governor inyakogo. Paisa Delhi sorkar nung Finance, Planning,

GST kübok petrol & diesel medendaksür: Nirmala Sitharaman

New Delhi, September 17, 2021 (Agencies): State sorkartemi GST kübok petrol aser diesel dendaktsütsü memolunger aser iba osangji Kerala high court dangi abentsü, ta Union Finance Minister Nirmala Sitharaman-i ashi.

Hokolbarnü Lucknow nung Nirmala Sitharaman menden ser 45 buba Goods and Services Tax (GST) Council senden amendang iba telemtetba agi.

Kerala high court-i tuyuba atema dang GST council senden nung GST kübok petrol aser diesel dendaktsütsüba onük benoka jembu, ta Nirmala Sitharaman-isa ashi.

"Nisung kari Kerala high court nung GST kübok petrol aser diesel dendaktsütsü onük benoka jembidang okadaki GST Council dangi abentsü akok ta ashi. Iba jagi onoki iba onük benoka olemtepdang senden nung adenertemi magizük" ta Union Finance minister-isa metetdaksü.

"Tang ya GST kübok petrol aser diesel dendaktsütsüba mapang ka masü ta Council-i bilemer. Iba telemtetba ya onoki okadak dangi abentsü" ta laisa ashi.

"Tanü GST Council senden nung cancer anepaluba mozütem dena mozü aika nung GST jenjang reprangshimogo. Onoki nübertem atema telemtetba aika agiogo" ta Sitharaman-isa ashi.

Tangalen nungi bener aruba Zologensma aser Viltetso mozü amala nung GST exemption süogo. Maneni, September 30 nungi December 31, 2021 tashi Covid mozütem nung GST rates ajema agitsü atema GST council-i lemtetogo, ta laisa shisem.

GST council-isa Swiggy aser Zomato nung GST agitsü telemtetba agiogo aser iba ajanga 'food ordering' jenjang tasakba akümtsü.

GST Council-isa fruit juice nung GST 12% nungi 28% agitsü lemtet aser iba ajanga fruit juice jenjang tasakba akümtsü.

Union MoS Chadrsekhar-i Kohima nung STPI center lapoktsü



NIELIT Chuchuyimlang nung ki tasen lapoktsü

Kohima, September 17, 2021 (TYO): Union Minister of State for Skill Development & Entrepreneurship, Electronics and IT, Rajeev Chandrasekhar-i Hokolbarnü Nagaland nung mapatong tongti ana lapoktsüogo.

Mezüngbuba nung pai Directorate of Information Technology and Communication, Kohima nung Software Technology Parks of India (STPI) center lapoktsü. Iba centre ya linük nung 61 buba aser Nagaland nung mezüngbuba lir.

Tanabuba nung Union Minister Chandrasekhar-i Mokokchung district nung National Institute of Electronics & Information Technology (NIELIT) Chuchuyimlang nung ki tasen lapoktsü.

Chandrasekhar-i Union MoS mapa inyaktsü tenzüka sülen anogo ananü atema Nagaland semdangi arua lir.

"India nung information technology aser skill development & entrepreneurship mapa balala lir saka mapa anaprong ya lanurtem dak rangloka lir" ta tanü STPI Kohima center lapoktsüdang Union MoS-i ashi.

Iba wadang ana ajanga linük nung lanurtem nem maongka, teimla aser azükari bentsür

arutsü, ta paisa ashi. "Prime Minister Narendra Modi-i lanur dangi technology anasa bener arutsü aser North East nung technological ecosystem ka yanglutsü alizüng ayuba nung STPI lapokba ya shilem ka lir" ta MoS Chandrasekhar-isa metetdaksü.

"Prime Minister-i iba mapatong ana nung kanga temolung agütsür. Ni Northeast semdangi arubaji ki lapoktsüba dang masü saka NE lanurtem dang maongka makoksatsü atema tayongzüka agütsütsü atema aru" ta paisa ashi.

Linük nung NIELIT center tem indang tongtipang alizüngji nübertem dang skills, knowledge aser expertise sayutsü atema lir. Northeast nung training centers ajanga lanurtem angazüktsü ajungmesor aser maongka tasentem angur, ta Chandrasekhar-isa ashi.

"Taruba ita 6 nungi 8 tsünga Northeast nung COVID sülen tensa ka nung shisatsü aser inyakyim tasen kar adoktsü" ta paisa shisem.

COVID-19 adokba sülen alima nung technology kanga nüngdaka kumogo aser India nunga IT sector jenjang tajungba akümba ajanga alima nem technology agütsütsü angur, ta

MoS-isa metetdaksü.

"Taküm kum tsünga linük nung IT sector nung mapa lakh 5 tashi adokogo. Külen, electronics manufacturing aser maintenance nunga mapa tasen 3 tashi adokogo. Anungji North East nung aser talisa Nagaland nung lanurtemi pei tarutsü atema shisa kaa iba wadang nung ajemoka inyaktsüla" ta Chandrasekhar-i ayongzüka.

Paisa Ministry of Electronic & Information Technology dang mapa adokdaksütsü atema State Government aser State Administration den külemi yaritepa inyaktsü ashi.

"Nagaland sorkari STPI aser NIELIT amshia shisaliok rejutem den sendakteptsüla aser state nung mapa talila adokdaksütsü ayongzüker" ta Union MoS Chandrasekhar-isa metetdaksü.

KÜM 2 TSÜNGDA IT SECTOR NUNG NAGALANUR NEM MAPA 5000 AGÜTSÜTSÜ

"STPI ya grants agütsütsü aser entrepreneurs jangjatsü atema dang masü saka India sorkari mentorship ajanga parnok len anitsü" ta Information Technology & Communication, New & Renewable Energy Advisor, Mmholnumo Kikon-ia ashi.

(Maneni tapak 10 nung...)

COVID-19 Nagaland: 46 taneptsü angu, 17 dak putet & 4 asü

Kohima, September 17, 2021 (TYO): Nagaland nung tanü agi anogo tugububa atongtepa COVID-19 puteter dang nungibo taneptsü angur teimba liasü. Tanü COVID-19 puteta alir nisung 46 taneptsü angu aser 17 dak putet.

"Testüiba ghonda 24 tsünga nisung 17 dak COVID-19 putet. Parnokji Kohima nung 7, Dimapur nung 6 aser Kiphire o Phek nung anana (2) lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Kasa mapang nisung 46 tashi taneptsü angu. Parnokji Dimapur

nung 21, Kohima nung 9, Mokokchung, Mon o Phek nung pungugu (5) aser Longleng nung 1 lir" ta paisa ashi.

"Nisung 30,780 nungi 28,715 taneptsü nguogo aser ibaji 93.29% lir. Tang nisung 471 anepaludar" ta Dr Kikon-isa ashi.

Hokolbarnü COVID-19 puteta alir nisung 4 asü. Parnokji Dimapur nung 3 aser Kohima nung ka liasü. Tanü asürtem züngsema tasür ajak agi 652 kumogo, ta Dr Kikon-isa metetdaksü.

"Brihostibar tashi nung nisung 675,432 nem COVID-19 vaccine

indang dose 960,943 agütsüogo" ta State Immunization Officer, Dr Ritu Thurr-ia ashi.

"Vaccine agirtemji frontline workers 60,913, healthcare workers 15,993, arishi kum 45 ser temapur 195,971 aser arishi kum 18 nungi 44 tsünga alir 402,555 lir" ta paisa ashi.

"Vaccine agirtem rongnungi nisung 285,511-i dose anaprong agiogo. Parnokji frontline workers 46,695, healthcare workers 13,121, arishi kum 45 ser temapur 125,523 aser arishi kum 18 nungi 44 tsünga alir 100,172 lir" ta Dr Thurr-isa metetdaksü.

Nagaland Board of School Education ajanga totuyuba agütsür

Dimapur, Rongjui/Sept. 17 (TYO): COVID-19 tashidak wara mechi state nung April 30, 2021 nü nungi school tem shibanga online nung May 24, 2021 nü nungi agiyonga arur. Ajisiaka tesayur, kaketshir aser tsüraburtem online ajanga sayuba aser angazükba yimya süpaba nung timtem tetsükdaksü jenti ajangshia arur, talisa digital divide aser network majungba yong tepang agi meshitetba timtem balala ajurua arur, ta Nagaland Board of School Education (NBSE) sangdong ka ajanga ashi.

Item timtem aser NEP 2020 nung kaketshir renlokba mapang shia asadangsü shia aliba ama Class VIII Examination 2021 (Government School tem kisung atema) aser Class IX Final Examinations 2021 atema NBSE ajanga revised assessment scheme ka agütsüogo.

Register süa aliba Private school tem ajunga nung Class VIII Examination 2021 atema kasa assessment yimya ya amshitsüla. Iba atema teinyakstütem yamai agütsür:

1. Phase ana (PHASE I &

PHASE II) nung tatidang ana agütsü.

2. Phase shia marks ya subject shia external examination atema lezmükja aliba shilem 50 asütsü.

3. Question paper ya Board ajanga tang amshiba yimya nung tasüngdangba yimya ajak alütsü.

4. Tatidang mapang ya minute 90 alütsü.

5. Syllabus ajunga ya ana kuma sadangsü. (PHASE I & PHASE II examinations atema subject-wise division of syllabus ya Board indang portal nung upload süja lir).

6. Question paper indang blueprint ya khen lir subject shia phase lemsar agütsütsü.

7. Tatidang phase shia indang question paper ya Board indang portal

(www.nbsenl.edu.in) nung agütsütsü aser school temi phase shia indang question paper ya download asütsüla. Question paper download asütsü atema ya khen lir osang tejangjaba agütsütsü.

8. PHASE I & PHASE II indang marks ya bendener final

result atema amshitsü.

9. School temi subject ajak nung internal assessment agütsüla aser final result renemba nung amshitsü atema marks bendena yua atatsüla.

10. PHASE I examination ya October 2021 tatemlen aser PHASE II examination ya December 2021 nung agütsü. Routine tejangja aser result submission aema mapang ya khen lir agütsütsü.

11. Tensa dak apet phase ana tatidang ya kechi yimya nung agütsüar school nem metetdaksütsü.

Anungji Board nung register süa aliba reju tekolakpur anungai Class VIII aser Class IX tatidang asoshi temelenshi ya meteta alütsüla aser annexure nung shia aliba ama topic/ chapter tem renemtsü asoshi tesayur nem nungloksütsüla.

Kaketshir temia tatidang yimya melenshiba ya meteta alütsü tim. School tem nung agüja aliba topic ya renemtsüla aser kaketshirtem imlaba ama angazüktsü asoshi mera balala agütsüla, ta NBSE sangdong ajanga ashi.

NSCN/GPRN ajanga asür Moniel Ruwngdal mang ayimer

Dimapur, Rongjui/Sept. 17 (TYO): Anojungi September 15, 2021 nü Kiusumong Battalion, Naga Army nungi 2nd Lieutenant Moniel Ruwngdal, Army no. 43225/14 asüba atema Government of the People's Republic of Nagalim (GPRN) ajanga mang ayimer. Pa ya Khurmi region kübok Thorcham yimtsung nungi lir. Pa ya Naga lima tenzükba wadang nung 2014 küm January 14 nü tenüng zülüoka liasü, ta MIP, NSCN/

GPRN sangdong ka ajanga ashi.

Pa tasünü tashi linük meimba molungsentsü nung Naga lima tenzükba liasü. Pa asüba ajanga tawa adokba kanga jangja metettsü aser asüngtsü tasak alütsü. Pai Naga lima asoshi anibelem mesasai nokdakba yong pa tenüng Naga nunger puti otsü nung teti tetshitsü, ta sangdong ajanga ashi.

Pai Naga lima asoshi mapa tajung jenti inyaktsüba temaitsü

Naga Army indang Adjutant General (AG) ajanga September 16, 2021 nü pa nem akum agüja Lieutenant rank agütsüogo.

NSCN/GPRN ajanga asür Lieutenant

Moniel Ruwngdal'er kinunger den asükhü lemsateper aser Tulusang Tsüngremi kinunger nem temolung nung anisüngzük agüjang ta sarasademtsür. Asür tanüla teti tatem maka tesunep nung anisüngzükjangma, ta sangdong ajangasa ashi.

Dimapur Ao Lanur Telungjem-i tenüngsang agütsür

Dimapur, Rongjui/Sept. 17 (TYO): Dimapur Naga Students' Union (DNSU) tang kümsük nung tir inyaktsü shimtetba atema Moayanger Jamir nem tenüngsang agütsür, ta Dimapur Ao Lanur Telungjem sangdong ka ajanga ashi.

Ozü züngsem tajung ka dak tamang katetba atema DNSU indang Nominating Committee danga pelaba lemsateper. Nenoki imli sayuba atema pela agizüker, ta DALT Media Cell ajanga ashi.

DNSU ketdangpur tasen ajak den tepela lemsatepba

mapang ner team-i tajungtiba nung maparen balala inyakyoka aotsü atema sarasademtsür aser loktiliba maparen balala inyakba nung maneni amteper aotsü imla atar. Tsüngremi DNSU maneni moajangma, ta sangdong ajangasa ashi.



Ato Kilonser Narendra Modi sor küm 71 ajungba nungtem nung BJYM Mkg District tir Longsaakum Lungkumer, general secretary Takojungba Jamir aser BJYM state executive züngsem Limameren Longkumer aser Imtinukshi Imchen nungertemi anir BJYM Mokokchung District ajanga Swachh Bharat Abhiyan sentong ka September 17, 2021 nü agia liasü.

Tenüng menüktsüba atema NSCN(R) dang tatok meshir

- Ni, 1) Mr. Imtisuneb (Kangtsüng), S/o. Lt. Mr. Shiluenba.
2) Mr. Imtiangshi (Kangtsüng), S/o. Lt. Mr. Temjennemba.
3) Mr. Merenkaba (Kangtsüng), S/o. Mr. Chubamangyang.
4) Mr. Hempem (Anaki Phom), S/o. Mr. Chingba.

Onoki NSCN(R) tenüng amer, tenüng menükja aibelen kanga tulu inyakogo. Tanaben yamaji meinyaktsü nenok NSCN(R) matsüngdang nangzükker aser imlibilema onok nem tatok agüjang ta mepishir.

Th. Muivah-i Vikiye Achumi asükhü lemsatep

Dimapur, Rongjui/Sept. 17 (TYO): Vikiye Achumi, Kilonser, UT asüba osang angashia ni temolung kanga shiranger aser jashir, ta Th. Muivah-i asür kinungtsü Nihuli Achumi dangi shidi ka zülüa liasü. Vikiye Achumu ya Hukai village, Niuland nung Vixiho Achumi'er jabaso lir.

Linük tenzüktsü temolungtetba aser tejangraba tulu ung asür Vikiye Achumi ya national movement nung dena liasü. Pa nem mapa balala nungloksü aser item ajanga linük meimba

molungsentsü nung temolung süa inyaka aruogo, ta Th. Muivah-i ashi.

Pa asüba ajanga tawa adokdaksüba shingaiia süngdaksütsü makok.

Pai bendanga agütsür tenzükba kodanga mamadoktsü aser teti bilemtettsü. Naga linük tenüng nung ni Tulusang Tsüngrem dang kinunger adianutem molung süngzüktsütsü aser kumzükba ayutsü atema sarasademtsür. Asür tanüla teti tatem maka tesunep nung anisüngzükjangma, ta paisa ashi.

Mokokchung Police-i samar aliba nisung tasümgang ngutetogo

Dimapur, Rongjui/Sept. 17 (TYO): Police Station-II Mokokchung dangi tetsür ka samaba ashishitep ken o ka September 14, 2021 nü arua külemi iba nisung bushiba maparen tenzük, ta sangdong ka ajanga ashi.

Police temi samar aliba nisung bushiba mapang nisung tasümgang ka Mokokchung District Jail anasa ngutet. Iba sülen tasümgang ya kinungbui pa kinungtsü, ta jangjateta liasü.

Iba dak sendakba nung nisung tepsetba ken o ka Women Police Station Mokokchung nung benok aser

Chuba Chang, NPS SDPO (HQ) Mokokchung tekolakba sür Special Investigation Team (SIT) ka tenteta ken o bushisüngdangba mapang lir, ta sangdong ajangasa ashi.

Workers from two taxi cooperatives assemble miniature gardens on the rooftops of unused taxis parked in Bangkok, Thailand

Taxi fleets in Thailand are giving new meaning to the term "rooftop garden," as they utilize the roofs of cabs idled by the coronavirus crisis to serve as small vegetable plots and raise awareness about the plight of out of work drivers.

NFHRCC ajanga asükhü lemsateper

Dimapur, Rongjui/Sept. 17 (TYO): Nagaland Foot Hill Road Coordination Committee (NFHRCC) nung tebu-teti aser committee tentetba nung züngse, Hotongse Sangtam mapang talanga shiranga aruba asüba asoshi NFHRCC nung alirtem temolung khurema jashir, ta Convenor Supu Jamir aser general secretary W.

Lemba Chang nati sangdong ka

ajanga ashi. Pa ya teindang lenir ka aser arishi tepiyong nüburtem tenzükba aliba takum ka lir.

NFHRCC ajanga asür kibong den asükhü lemsateper aser Tsüngremi parnok molung süngzüktsütsü aser tashi agütsütsü atema sarasademtsür. Asür tanüla teti tatem maka tesunep nung anisüngzükjangma, ta sangdong ajangasa ashi.

Assam CM Sarma-i IWT indang rong 5 sayatsü



Guwahati kübok Lachit Ghat nung Assam CM Himanta Biswa Sarma-i IWT indang rong 5 sayatsüdag agiba noksa angur.

Guwahati, September 17, 2021 (Agencies): Assam Chief Minister Himanta Biswa Sarma-i Guwahati, Dhubri aser Majuli district tem nung Inland Water Transport (IWT) rong pungu tashi sayatsüogo.

Hokolbarnü Guwahati kübok Lachit Ghat nung CM Sarma-i rongtem sayatsü.

September 8 nü Jorhat nung Nimatighat rong lendong atalokba sülen Assam nung single-engine ferry services anena lir. Iba jagi IWT-i rong sayaba ajanga water transport aser ferry services tajungba akümtsü.

Inland Water Transport kübok item rong ya Guwahati nungi Kuruwa, Nimatighat

nungi Kamalabari, aser Dhubri tsungda senzütsü.

Rong tasentemji MV Sonai, MV Lohit, MV Pratima, SDB Vikrant aser SDB Vishal lir.

"Assam sorkarisa Ro-pax rong 5 alitsü aser double engine ferries atema Rs. 90 crore teyari agütsütsü" ta tanü CM Sarma-i metetdaksü.

Manipur nung JTSA-i lisopur MLA ajak mapa nungi anentsü akhanger

Imphal, September 17, 2021 (Agencies): Lisopur MLA temi Autonomous District Council Bill, 2021 (ADC Bill, 2021) atema ola madokba atema ola madokba atema mapa nungi anenang ta Joint Tribe Student's Association (JSTA)-i takhangba agütsüogo.

JSTA nung All Inpui Students Union (AISU), Liangmai Naga Katimai Ruangdi (LNKR), Rongmei Naga Students Organization Manipur (RNSOM) aser Zeme Students Organizations Manipur (ZSOM) dena lir.

"Tawa Assembly session nung lisopur MLA temi ADC Bill indang ola madokba ajanga tenemlen aliba district tem nung nübertem ratadaksür" ta JTSA Joint Secretary Jenthui Panmei-

ashi. Lisopur MLA tem dak dang tenemlen alirtem atema inyaksü tashi lir. Ajisüaka, parnoki taoba Assembly session nung ADC Bill atema ola madok, ta pai ashi.

Iba jagi JTSA-i lisopur MLA tem dang lisopurtem taginüba nung ajemdaker Manipur Legislative Assembly nungi anentsü akhanger, ta Jenthui Panmei-i metetdaksü.

"Tenemlen district ajak nung lisopurtemi memolungaka ADC ajak agienogo, saka iba amatenka nung ADC mapa balala nung nisungtem shimba atema ashishiteper. State sorkari hill district ajak nung ADC election agiba sülen ang nisungtem shimoktsüla. Sorkari hopta ka tsungda nisung shimokba mapa

manenra onoki lungkak aittsüa akümtsü" ta paisa metetdaksü.

State sorkari Tamenglong nung terenlok mapa inyakba mita reprangtsüla aser Hill Area Development Program (HADP) mapatem dak sendakba nung senotsü shitak agütsütsü, ta JTSA Joint Secretary-isa ashi.

Sorkari tenük yoka mereprangba agi JTSA-i Khongsang-Tamenglong lenmang yangluba nüka arudar, ta paisa shisem.

Hill Areas Committee (HAC) aser district councils nem tashi talila agütsütsü atema HAC-i Manipur (Hill Areas) District Councils Act, 1971 melenzüktsü atema Autonomous District Council Bill, 2021 yanglu.

Meghalaya HC atema Justice Ranjit V More

asert Tripura HC atema Indrajit Mahanty shim

Guwahati, September 17, 2021 (Agencies): Supreme Court collegium-i high court chief justice tasen 8 shimogo.

Parnokji Meghalaya High Court atema Justice Ranjit V More, Allahabad High Court atema Justice Rajesh Bindal; Calcutta High Court atema Prakash Srivastava; Andhra Pradesh High Court atema Prashant Kumar Mishra; Karnataka High Court atema Ritu Raj Awasthi; Telangana High Court atema Satish Chandra Sharma; Gujarat High Court atema Aravind Kumar aser Madhya Pradesh High Court atema R.V. Malimath nunger lir.

West Bengal nung polling tembangba sülen April 29 nü Justice Bindal ya Calcutta High

Court indang acting Chief Justice inyaksü shima liasü.

West Bengal nung election agiba sülen Trinamool Congress aser Centre tsungda mangatettep adokdang Justice Bindal tiyongtsü nung kanga mejeba liasü.

Tripura High Court nung chief justice teinyakdak Justice Akil Qureshi Rajasthan High Court nung aser Rajasthan High Court nung chief justice teinyakdak Indrajit Mahanty Tripura High Court nung inyaksü melentepogo.

Brihostibar nikongdang Supreme Court collegium-i telemetba agi ta osang ajanga ashi.

Chief Justice N.V. Ramana-i anir collegium nung justice UU Lalit aser justice AM Khanwilkar na dena lir.

Sonitpur Police-i taila hon ayokba mapa makdok



Guwahati, September 17, 2021 (Agencies): Sonitpur Police-i taila hon ayokertem anema mapa inyaka arudang Hokolbarnü taila hon den nisung ka puogo.

Tezpur police station kübok Napam market nung parnoki mita aodang nisung den hon apu.

Police-i taila gold biscuits seret 1 ser gram 400 ngutet. Taila honji Alal Ali'er jabaso Kitab Ali ta jangjaogo, ta Sonitpur Police-i Twitter nung metetdaksü.

Iba mapa nung shilem agirtem aputsü atema maneni bushisungdang südar, ta parnokisa ashi.

Manipur nung ZUF züngsem ka apu

Imphal, September 17, 2021 (Agencies): Manipur nung Assam Rifles sepaitemi Zeliangrong United Front (ZUF) züngsem ka apu.

Imphal West district nung Assam Rifles aser Manipur Police külemi mapa inyakdang ZUF züngsemji apu.

"Osang tejangja ka angazükba nung ajemdaker Assam Rifles aser Manipur police külem telok kati Tarung yim mita aodang telungpurji apu"

Parnoki pa Lamphel police station ket nung agütsüogo ta sangdong ka nung ashi.

Tripura nung BJP züngsem 5 tepuokdak ayur

Guwahati, September 17, 2021 (Agencies): South Tripura kübok Sabroom nung Tripura Civil Service (TCS) ktdangsur den sorkar mapa inyaker nisung 9 dak teka sangshiba atema okadak kati BJP züngsem 5 tashi tepuokdak ayutsü tetuyuba agütsü.

BJP züngsemtem Sujit Debnath (29), Sanjoy Patari (24), Biswajit Pal (46), Shibas Debnath (50) aser Jayanta Debnath (46) nunger yashi tepuokdaki yok.

Poangbari BDO Vaijayanta

Sarkar aser par staff-i Madhab Nagar yim nung administrative camp ka ayonga alidang BJP züngsemtemi amak.

Bodbarnü parnoki Prime Minister Awas Yojana indang beneficiary tem indang osang jangjatsü atema aodang iba lendong ajuru.

"BJP züngsem kari sentong alidaki aru aser beneficiary list yanglushitsü atema takhangba agütsü. Taoba sorkari beneficiary tem shim ta parnoki ashi" ta Sarkar-i metetdaksü.



Arunachal Pradesh kübok Longding district nung election timi agiba atema Arunachal Pradesh Governor - Brig (Retd) Dr BD Mishra-i "State Democracy Award" agütsüdag agiba noksa angur. 2019 küm assembly aser panchayat elections tiptema agitetba atema Longding district nem iba sempet agütsü. Maneni West Kameng district kübok Nafra nem "Best Performing Sub-Division award" agütsü. International Democracy Day amongdang Governor - Brig (Retd) Dr BD Mishra-i sempettem agütsü.



TIR YIMYIM YIMOBILEM (EDITORIAL)

DIMAPUR KÜPTOKNÜ RONGJUI (SEPTEMBER) 18, 2021

Sorkar Teyari Magiteter

- Tangsen Lemtur

Tang alima nung rongsenkettsung tulu aliba linüktem rongnung India densema lir, ajisüaka iba linük nung sensaker nütsung million 300 dak tema lir, ibayongji sorkari aluyimertem aser sensakertem taküm jenjang ajungkettsütsü atema asalentong jenti yanglua schemes balala ajanga teyari agüja arur. Yimti/jilatem den medemdangra sensaker nütsung timbaka yimdam yimtsüngtem nung lir, ibayongji sensakertem rongnungsa süaka sorkari yimdaklirtem dak tuluba rangloker inyaker. Yamaji Nagaland nunga yimdaklirtem atema sorkari scheme balala ajanga teyari agutsür, aser item teyari ajak jagi sensakertem anisüngzüksü, saka tia maka asenoki sorkar schemes mebushiba ajanga sorkar teyariji temoatsü kuma magiteter. 2014 kum Narendra Modi-i anir Centre sorkar akumba sülen-a schemes 100 dak tema benoka inyakdar, ajisüaka asenok aikati item scheme rongnung 10-a meshitettsü südi, iba kuliji ajanga asenoki Centre nungi yokba teyari balala magiteter. Tawa bank nung inyaker kati PMJJBY scheme indang angatetdakja liasü. Pai ashiba agi, Naga nunger aikati iba scheme indang memetet aser ishikati dang iba scheme atema enroll süogo. PMJJBY ya security scheme ka lir aser iba scheme ya bank account alir arrshi kum 18-50 tsungdapurtem atema lir. Iba scheme kubok kum shia bank account nungi sen 330 katitsü aser ajungbena süadokra pei kinungtsü/kinungbu/chirnuri sen lakh 2 angutsü. Ano külen Nagaland nung tema tereprangtsü nungbo schemes balala shitak inyaker amai sayur ajisüaka tesüiba kum ishika tsungda RTI telangzüba ajanga item senotsü ochishia mamshiba osangkakettem nung aiben zungshia arur. Sensakertem nem jenjang dalang agi jang, shini, dal aser kerosene densema chiyungtsü/tagitarutsü teyari balala yoker, ajisüaka aikati ibaji magiteter. Sorkari sensakertem shirangdang jenjang dalang agi mozü alitsü aser treatment agitsü atema mapatong balala benoka inyaker saka aikati iba teyariji magiteter; tanurtem, tanur tetsü aser teintet rogotem asoshi chiyungtsü, osettsüset aser senotsü teyari balala agutsür saka tatongtsüpur ket matonger; matamabensarterem asoshi teyari balala agutsür saka item senji kari chitsür! Iba dak alia aluyimtsü, shiruru metsütsü aser mapa tilateri tenzüksü atema Centre nungibo teyari agutsür saka tatongtsüpur ket shidak matonger. Tema nungbo teyari angutsüpur ket shidak tongtsür mesük saka senotsübo timbaka tom nung samar; item ama ochimashi mapa jenti alibayong tamalen Nagaland Public Rights Awareness & Action Forum (NPRAAF)-i New Delhi nung Central lenirtem ajurua Nagaland nung Centre-i sponsor asüba scheme balala (CSS) benoka inyakba maparen tenük yoka reprangtsü atema takhangba agüja liasü. Asen lima ochimashi tia Central lenirtem nem metetdaktsübaji asenok atema maaksü saka asen lima sensakertem tajangzük angutsü atema mapang shia Central lenirtem dang asen lima tiaji ladaka sayutsüla. Asenoki sorkar nungi teyari balala magitetba tongtibang kuli anaji- nüburtemi item schemes indang junga memetetba/mangashiba ajanga lir aser ketdangsertemia nüburtem nem item schemes indang awareness junga magütsüba ajanga asütsü ta bilemer. Sorkar ketdangsertem, melungtet teloktem aser lanur tangatetertemi social media densema sabang balala ajanga item schemes indang awareness agütsütsüla; yamaji nüburtemia item schemes rajema alitsü aser teyari agitsü atema osangolatsüla.

OLEMSABANG

Tenzükba Mapa nung Sodi agiba aser Tebilemstsü

~ Narola Lemtur

(Yashi adok nungi...)

Lanur tazünger employment tebilemstsü adoktsü ta asübaji tim. Tanü arogo aser mungdang nung tenzükba amai dang ora tebilemstsü adoktsü. Akhi putu nungi hopta nung sentep asem aser sen sarua mission mapa kar bendang lima inyakba, aser Mungdang nung Dr. Clerk mapang nungi Impur centre sür inyakba aruba mapatem, tat. agi, arogo semdangba, training balala agütsüba aser bendang lima mission mapa asoshi sen sarua inyakba jagi dangbo arogo nung unemployment adoktsü. Tang in yagi dangbo Ao theology azünger ajak mapa magütsütetsü aser alima maintsü. Mapa tasen inyaksü mejangrar nung koda sür employment problem madoktsü? Arogo tenyaba mapa aser wadang ulushia yanglushitsüla. Asenoki YSS nung teinyaksü aika, tat. agi, Detox centre, rehab centre, video game de-addiction centre, unemployed youth atema skill training balala, Caanan farmer movement, migrant worker mission, kidang teyariteper mission, ecological mission, mental health counselling centre, tsürabur malir teyariteper centre, hospital, boarding school, health ministry, community development work, aluyimba renlokdahtsüba, ano aika jembio. Arogoi wholistic tenyaba mapa tenzüksüla. Itemji Govt. aser telok balala den sendaktepa inyak nung rongsen leman renloktsü, mapa aika create sütetsü, nüburtem rongsen ketsung nunga renloktsü aser mapa jenti create sütetsü. Mapa maliba tebilemstsüji asen sasa koktettsü mangdang akatsü tim.

Putu den apet Tsüngrem O mesayutetba, amatari, memelenshili ta asüba tebilemstsü ajurubaji tim dang. Nisung ka doctorate zünger liaka shisatsü tasen mebushilokra, kum 10 tsungda nung alima den mapet akümer ta ashir. Anungji tenzük ka shisatsü nung update süa alitsübaji arogoi training balalai yoktsüla aser ajungshitsüla. Tenzük ka traningi yokbaji arogopur tajangzük asoshi ta metetsüla. Yamaji arogo facility teperi agütsür tangatetba nung merenloker, bendanga agüja tenzüksü tarongba mali ta asüba purji mapa nung sodi agütsütsüla. Anungji mungdang aser arogoi mapang shia tenzük takok-makok asangdanga aser iba nung tashi mait aser item nungji melenshitsüla, renloktsüla ta ajungshiteptsü inyakyim ka alitsü junger ta ajiteter. Nüburtemi temulung asü nung dang kum 68 mesüra 70 tashiji inyakdahtsütsüla.

Arogo ka nung dang sodi memeshi kum aika inyakba ajanga nüburtemi lakteta akumba ya tebilemstsü tulu. Nüburtemi lakteter, saka alternative maliba agi sodia memeshir ta asüba jenjang nung tanü tenzük aika lir. Iba tebilemstsü nung Pastor Imli Lemtur-i yamai zülü, "Nüburtemi malaktsüsa tenzükertem tenzüksü asoshi leman tajungtibaji 'Tenzükertem Reshuffle after every 5/7 years' ya ka asütsü amai bilemer. Tetezü, tenzükertem Arogo ka nung, mesüra mungdang nung süaka, retirement mapang matong tashi alibaji khi bilemdangtsü junger. Ajakbo masü, saka tenzük kar dak rangloker asenoki superannuation ya yanglushir. Tenzükba kumji 60/65/70a süang, mesüra 50 tashia bener aluyongya, nüburi maginüba tenzük karbo odang alima matem tashi alitsübasa. Nüburi malaktsüba timtemyabo superannuation melenshiba agi makoktsü amai bilemer. Tenzükari bendanga agüja tenzüksüji asenok ajaki metetta lir saka ajakbo kasa masü. Ajungji, nüburi malaktsüba mozü tajungtibaji 'Tenzükertem ajak, mungdang, college (Aorbo) and Arogo, ajak kum 5/7 nung melenshitsu (reshuffle) ya koda tasa pungmangeraja." MTBA, KABA aser DABA nungbo fellowship aika aliba ajanga kum pungu shia reshuffle asür aser nüburtemi melakteti inyakba angur. Yamaji Area balala, tzükong tsungda, mesüra tzükong balala tsungda reshuffle sütet nungbo ajungtsü amai bilemer. Pa o nungji semloka, T. Imti Jamir-ia yamai lemsatep, "Asen kidanger Sema nungeri yamaji Mungdang ajanga kum 5 tenzükerto tanga arogo kati yoker, saka pa/la pastor inyaka ali nung pastor mapai dang yoktsü ta dang masü, saka pa/la sempet repranger mapa balalai yoker.... Tangar nungi mapa tajung angazüksüla." Saka sempet aser bendanga agüja tenzüksü temulungtetba aser tanela makara "Term rotation agia nüburtemi laktetba mesüra sabuba solve mesütetsü südi", ta tarendak o ka Pastor Tiatoshi Longkümer-i shisem. Atangji Yisu kangki apur tila kümer bendanga agüja tenzükba asen tenzükba kimongji asütsüla. Temelen shisemba maparenji takok ngua inyaka aotsü asoshi ita sen nung liromedem nungdak aser tanga tebilemstsü aika adoker. Mungdang ajanga inyakyim tasen ka bener arutet nungbo koda jungla ta bilemer.

Tenzük asoshi Pension scheme

Arogo tenzükertem asoshi pension aser provident fund alitsü kanga nungdak, anungji ABAMi inyak nung ajungtsü. - Onenlemla lmsong

Kodang tenzük ka mapa nungi anendir panü nungjagi sensaker akümer - Rongsen Lemtur

Ao arogotem aika nung tenzük ka sodi agidang kum nung ita ka sen agütsüba dak alaka pension aser tanga social security kecha mali. Mapa nung anenba ita nungi kibong aika ala ashi jenjang ajuruba angur. Tanga lima doktsür, Nagaland nung danga sünga Association aikati mungdang nung tenzükertem aser lim arogo nung tenzük atema EPF aser pension scheme balala lapokja lir, saka tanü tashi Ao arogo nung lim arogo kari inyakba dak alaka Mungdangi achaayangba mangur. Pastor Tamsü Jamir-i par arogo nung yamaji inyakba ka shisem, "Ozü arogo nungbo toklang tenzükertem asoshi Employees Provident Fund tenzükja lir. Arishi kum 57 sülen arishi piyong pension agia alitsü. Pension agisangji/agilaji asü-ama ka süra, pa/la spouse-i pension-ji masü tashi agitsü. Minor tanur lira, tanurji kum 15 pension agitsü. Arogotem ajak nung ya ali nungbo kanga ajungtsü ta bilemba agi lemsateper. Moyar arogobo aika iba ya tenzükogo. Iba website www.epfindia.gov.in nungi tejangja zülua angur. Iba ya kanga junger aser asenoki tenzükter." Shisadangtsü tongtibang onük ka ta angatetdi.

O-tem

Nisung ajak kum tasazük ka tenzük mapa nung sodi agir. Tashikadang mera ket keta tenzük arur, retirement atema jilia plan mesüba ajanga, tenzük aika tushia aliba ajangashia arudaki. Koda retirement jilia renemtsü tangatetba arogo aser tenzük nem agütsütsü nungdak ta ajiteter. Tenzük kijai dang masü, saka arogo aser mungdanga shilem kar ta ajiteter. Iba sensaksem ajanga tangatetba tasen aser mera tasen ka arogo nung agitetdakjang ta sarasademer.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Myanmar nung sepaitemi Baptist Arogo Tenla ki ka raksatsü



Taküm May ita nung Myanmar nung sepaitemi raksatsüba Tenla ki ka yangi noksa nung angur.

September 17, 2021: Myanmar nung Khristan nütsüng timba aliba Chin State nung Burmese Army (Tatmadaw) aser democracy pusemer telok na tsüngda sashia raraba sülen September 14, 2021 nü sepaitemi Thantlang jila nung aliba Baptist Arogo Tenla ki ka raksatsü, ta International Christian Concern osang ajanga metetdaksü.

September 14 aonung Myanmar sepaitemi Johnson Memorial Baptist Arogo Tenla ki raksatsü ajisiüka nisungbo

shinga meyiru. Tatmadaw sepaitemi Tenla kidangji nisung kar jenoka alitsüa akok ta bilema amak asütsüa akok mesüra Chin nung tamangba yimsü temaitsü raksatsütsü nükjidong nung inyak asütsüa akok.

Taoba hopta Chin National Army aser local resistance group Chinland Defense Force (CDF) nati sepaitem indang outpost ka amakba sülen Tatmadaw sepaitemi Lungler yimda ki ki aika poksaja liasü. Taoba hopta raradang Tatmadaw sepaitemi 12 aser

parnok indang camp ka rongdokja liasü. Chinland Defense Force (CDF)-i ashiba agi, September 12 nü CDF züngsem 400-i sepaitem indang camp ji maaka liasü.

Chin National Army aser Chinland Defense Force (CDF)-i sepaitem amaker saka yangji alirtem civilian tembo lendong nung yutsür, kechiyong kobi melii Tatmadaw sepaitemi yimtsüngtem nung yimdaklirtem nem timtem maneni agütsütsü ta bilemer. Rara ajanga nisung meyirjang aika India arrotsüleni jena ogo.

UP nung Khristanem anema inyakba kanga bulua kümdar

September 17, 2021: India kübok Uttar Pradesh nung Khristanem anema inyakba kanga bulua kümogo; tesüiba anogo 10 tsüngda kija nunga iba state nung Khristanem anema inyakba tatalokba 10 tashi liasü.

Taküm June ita nung Uttar Pradesh yimtiba, Lucknow nung Muslim nung anati Hindu nung 1000 Islam yimsü dangi meyipdaksü, ta tai tonglokba apuba sülen nungi Khristan aser Muslim nung anema inyakba kanga bulua kümogo.

June ita nungi tenzüka tang tashi nung Uttar Pradesh nung Khristanem anema inyakba tatalokba 30 lir. UP nung anti conversion ozüng kübok Hindu yimsü alia amangertemi Khristanem nem tai tongloksüba nung ajemdaker pastor tem densema Khristan 71 pua police station-i anir ao.

ICC den jembidang Raibarely district kübok Kushurupur nung Khristan lenir kati, "Ozü kiyong nungbo Khristanem iba ya ozü lima masü amai bilemer, aser mapang shia Bajrang Dal teloki Khristanem amokmerener," ta metetdaksü.

September 8, 2021 nüa Bajrang Dal züngsemtemi Sanju Devi leniba nung Khristanem tekülem sentong agütsü lia timtem agüja liasü.

September 7, 2021 nüa Hindu nung telok kati Pastor Raju Manji aser par santem dak azükba sülen police station-i anir oa liasü. Iba sülen anti-conversion ozüng nung ajemdaker Khristan aika tepuokdak yuogo.

ICC den jembidang Khristan lenir kati, "Azamgarh, Jaunpur aser Varanasi nungbo tamangertemi adenshia tekülem sentong magiteter. Khristanem adenshira Hindu nungertemi azüker, amokmerener mesüra apur. Item ama tatalokba timbaka nung police-i meyarir, kechiyong parnok iabelenertem den obang ka ser inyaker," ta metetdaksü.

ICC Regional Manager for South Asia, William Stark-i, "Uttar Pradesh nung Khristanem kanga reshikangshiba osang angashia International Christian Concern-i tebilemsü akar. Tesüiba anogo 10 kija nunga Khristanem anema inyakba tatalokba 10 liasü. UP sorkari item ama mapa ya maneni melara Hindu yimsü alia amangertemi Khristanem taliba reshikangshitsü aser Tenla kitem shibangtsütsü," ta metetdaksü.

India kübok Uttar Pradesh nung police-i Hindu alia amangertem den amalitepa Khristanem anema inyaker, ta

ADF-ia metetdaksü. Alliance Defending Freedom-India nung züngsem, Dinanath Jaiswar-i, "Uttar Pradesh police ya tanga state tem nung aliba police dang nungi khenyongi balaka. Parnoki Khristan aser Muslim nung dang mesen-metui benschir aser police ket nung minorities anema mejungi inyakba tatalokba aika lir, ajisiüka Tsüngrem temeim ajanga onoki mapang shidak nung police ket nung alirtemji kümzüker. Tsüngremi Pa nüburtem kümzüker," ta ashi.

"Yangibo (Uttar Pradesh) police ketdangser kati ain adoka parnok ket nung alirtem dak azüktsüji kanga melamelar," ta Jaiswar-i ashi.

Uttar Pradesh kübok district aika nung police stations nung nisung reshikangshiba aser tarak keta yirutsüba tatalokba aika lir, ta National Crime Records Bureau ajanga metetdaksüogo.

Alima nung tamangba yimsü tulu pezü- Hinduism, Buddhism, Sikhism aser Jainism aliba linükji India lir. 2011 küm census data ajanga ashiba agi, India nung nütsüng shilem 80 Hindu nung lir, Muslim nung shilem 14, Khristan shilem 2.3, Sikh shilem 1.7, Buddhist shilem 0.7 aser Jain shilem 0.4 lir.

ANOGO ABEN TSÜNGREM DEN

Meshiang aser nai angutsü

Nenoki meshir, saka mangur, kechiaser nenok pei azüabung nung endoktsü asoshi nenoki aibelena meshir. Yakob 4:3

Yakobi iba shidi tamangertem dangi zülu - kin ter ana prokshia alir dangi zülu (1:1). Apijemtsü Shin kaket nung ama pai shisa kaa alitsü indang zülu, aser pai temeshi liba-liro aser Tsüngrem O nung tashi angaba dak ranglok. Angashitsü karaang, jembitsü meilungi süang, ain adoktsü milungi süang, tsürabur malir aser amitsür semdangang, temeli azüokang; aser ne tamang akangakanga liang.

Idangji pai kechiba parnok nungdak asüngdangtsüla aser koda asüngdangtsü iba indang jembi. Nübur rongnung Tsüngrem nungi item kuli asem rong nung ka mesüra kati anünga lir: 1) Parnok makar kechiaser parnok masüngdang, 2) Parnoki tai meshir, aser 3) Parnoki Tsüngremi mulungba ama masüngdang.

Laishiba ajunga nung asenoki Tsüngrem dang koda meshitsü aji shia lir. Aiben Yisui meshiang aser nenoki angutsü ta ashi (Mathi 7:7; Luke 11:9). Asenoki kechisa meshir aji asenok nem agütsütsü ta Yisui ashi (Yohan 15:7). Yohani ashi, asenoki kechisa meshidir Pai agütsütsü ta asenoki amangtsüla (1 Yohan 5:15). Tejen Lai nung Dawid ashi, Tsüngremi asen mulungjangi jangraba ajak agütsütsü (T.Ken 37:4). Süra kechiba asenoki asüngdangba asenoki mangur? Idakji tama metettsüba ka lir. Asenoki tebilemba shitak agi meshitsüla; asenok Pa dak alitsüla; asenoki Pai mulungba asüngdangtsüla aser Pa O azüngba aser sarasademba ajanga asenok Pa dak pelaa alitsüla. Sempet tajung ajak Tsüngrem nungi lir, asenoki koda Pa dang asüngdangtsüla aji dang asenoki metettsüla.

Tsüngrem, Nai mulungba ama onoki asüngdangra tasüngdangba ajak agütsütsü nangzük nung Ne tenüng asanger. Amen.

Karnataka nung Prayer Home ka amak



Mumbai, September 17 nungertemi Khristanem (Agencies): India nung tekülem sentong agia li timtem Khristanem anema inyakba agütsü aser Evangelical Arogo kanga bulua ataloker, aser iba nung pastor ji police station-i anir ao.

Shisabulu tuluka kümogo, ta Global Council of Indian Christians (GCIC) Tir, Sajan K George-i metetdaksü.

Tasügnü Rev. Rajesh Kumar-i Rev Majhi nem chiyungtsü bener otsüdag police-i pa-a apu.

Taoba Hokolbarnüa GCI Tir, George-i, (September 10) Karnataka kübok Udipi district nung Hindu Jagaran Vedike (HJV) "Khristanem tekülem sentong züngsemtem Khristan prayer agütsür, tai maket pastor tem home- Pragathi Centre-i arua dak azüker aser apur. timtem agütsü. Tetasatsüka Hindu nationalist party BJP-i yimsüsüba state tem nung iba ya yimya ka kümogo," ta metetdaksü.

Hindu yimsü alia amangertem jagi sarasadem sentong ayongsang, Benedict-i Hindu nungertem Khristan yimsü dangi meyipdaksür, ta tai tonglokja prayer home ji agütsü. Tesüsa police aruba sülen HJV züngsemtemji anir ao.

"India nung nütsüng ishika dang aliba Khristanem ozüng alema meinyaker, saka linük temzüng nung agüja aliba temeden benschir," ta paisa ashi.

"Kangshia tamangba yimsü meyipdaksür, ta tiyazü nung tai tongloksür aser ibaji tamangba lokti balala tsüngda raradaktsütsü atema lir.

Tesülen HJV teloki tiyazü kuli agüja Karkala police station nung Khristanem anema ken o benok.

Taoba hopta nungsa Tetsürtem aser tanurtem September 7 nü Uttar Pradesh anema-a inyaker. Secular India nunga anti conversion ozüng nung Khristanembo 'second-class' sensotem asü?" ta pai Rev. Raju Majhi apu. Hindu asüngdang.



September 17, 2021 nü Srinagar nung aliba BJP headquarters nung BJP lenirtem aser party nung inyakertermi Ato kilonser, Narendra Modi sor küm 71 ajungba anogomong nungtem nung sentong ka agidang tangokba noksa nung angur.

Afghanistan tensa ajanga India mejungi kongshitsü: PM Modi

New Delhi, Rongjui/ September 17 (Agencies): Hokolbarnü India Ato kilonser, Narendra Modi-i, tang Afghanistan tensa atema tebilemtsü akar aser iba linük nung tatalokbatem ajanga India kongshir, ta metetdaksü.

SCO-CSTO Outreach Summit nung Afghanistan atema jembidang Modi-i tang Afghanistan nung nüburtem rongsenkettsüng aser tanga lenla balaa nung timtem ajangshiba metetdaksü.

Modi-i, "Tang Afghanistan nung meimchir dak sendakba timtem tulu lir. Rongsenkettsüng aser shishilembaba tsütsülen tetsükdaksü aliba ajanga Afghan nung rongsenkettsüng tsütsü timtem tuluba akümer. Item timtem denji külemi coronavirus wara lir," ta ashi.

Taliban teloki Afghanistan agiba dak sendakba nung Modi-i, tawa linük nung yimsüsüba menden melenba nungji ajak medendaksü aser jembishinü kecha mesüi sorkar tentet, ta

ashi. "Ibaji ajanga sorkar tasenba nungji tashishitsü lir. Sorkar nungji tetsürtem, minorities aser Afghan nung loktiliba ajak züngsemstüla," ta pai ashi.

Afghanistan tensa ajanga India ama kidanger linüktem tamajungba kongshitsü, anungji region nung rangloker linüktemi amalitepa inyaksü nungdak, ta pai ashi.

"Afghanistan nung tatalokbatem ajanga temesepba mozü aser ozüng alema hadirtem shibelenba den külemi nisung shibelenba mazüoktettsü. Afghanistan nung raraba hadir tajung aika lir. Ibaji ajanga region nung timtem adoktsüa akok," ta pai ashi.

"Afghanistan nung tashimait lira alima tesem ajaklen kiralongra ajungmesotsü. Tanga kiralongrar teloktemia rara ajanga sorkar atsüngdoktsü merangtsü," ta pai ashi.

Afghanistan nung sorkar tasenba agizüktsü atema alima linüktemi o kanga junga

lemteper telemtetba agitsü nungdaker, ta paisa ashi.

"Linük ajaki kiralongra ajanga takoksa nguogo, anungji linük balala nung kiralongratsü atema Afghanistan nung li mamshidaktsütsü atema asenoki longjemer inyaksüla. Iba onük nung SCO züngsem linüktemi bangzüng tesashi renemtsüla," ta Ato kilonseri ashi.

Alima linüktemi Afghanistan nung nem teyari balala agütsüba nung tetsükdaksü malitsü atema asenoki longjemer inyaksüla, ta paisa shisem.

Afghanistan tensa atema India-i United Nations nem tongti shilem ka agidaktsünser, ta paisa metetdaksü.

Shanghai Cooperation Organization (SCO) aser Collective Security Treaty Organization (CSTO) summit ya Tajikistan yimtiba, Dushanbe nung hybrid format nung agir. Iba senden nung kari video link ajanga adener aser karbo tsüngdong oa adener.

UP election atema Congress-i screening committee ka tentet

New Delhi, September 17 (Agencies): Sangküm küm tetenzüklen Uttar Pradesh Hokolbarnü Congress Tir, Sonia Gandhi-i party screening committee ka tentetogo, aser iba committee nung chairman ji Jitendra Singh shimogo.

Iba committee nung züngsemtemji Rajya Sabha MP, Deepender Singh Hooda, Maharashtra nungi party MLA, Varsha Gaikwad aser Uttar Pradesh nung party general secretary in-charge

nunger lir, ta party osang ka ajanga metetdaksü.

Iba committee nung ex-officio züngsemtemji UP Congress Tir, Ajay Kumar Lallu aser UP nung Congress Legislature Party lenir, Aradhna Misra na asütsü.

Kasa committee nungsa ex-officio züngsemtem rongnung UP atema AICC secretaries ajak densema lir, ta party sangdong ka ajanga metetdaksü. Iba committee-i UP assembly election atema party candidate tem shimtsü.



September 16, 2021 nü Minister of Petroleum and Natural Gas & Housing and Urban Affairs Hardeep Singh Puri (tiyong)-i "Modi Stole My Mask" kaket sayatsüba noksa nung angur. Iba kaket ya Amit Bagaria (abelen) aser Savid Rodrgues (ajichi) nati zülu.

India nung ano nisung 34,403 dak covid putet aser 320 asü

New Delhi, September 17 (Agencies): India nung ano nisung 34,403 dak coronavirus putet aser tang tashi nung linük nung nisung ajak senteper 3,39,056 dak iba tashidak putetogo, ta Hokolbarnü Union health ministry-i metetdaksü.

Tesüiba ghonda 24 tsüngda linük nung coronavirus tashidak agi shiranger 320 süogo aser tang tashi nung linük nung iba tashidak agi shiranger 4,44,248 süogo.

Tang India nung coronavirus agi teshirangdakpurji coronavirus caseload nungi shilem 1.02 dang lir aser iba tashidak agi shiranger shilem 97.65 anepogo.

Brihostibarnü samples 15,27,420 tendanga liasü aser tang tashi nung samples ajak senteper 54,92,29,149 tendangogo, ta Health Ministry-isa metetdaksü.

Tang India nung anogo shia

coronavirus positive putetba shilemji 2.25 lir aser hopta shia positive putetba shilemji 1.97 lir.

Iba tashidak agi shiranger 3,25,60,474 anepogo aser iba tashidak agi shiranger asüba shilembo 1.33 dang lir, ta Health Ministry-i metetdaksü.

Tang tashi nung India nung coronavirus vaccine dose crore 77.24 dak tema agütsüogo. India nung taküm May 4 nü coronavirus case crore 2 ajung aser June 23 nü crore 3 ajung.

EAM S Jaishankar-i Russia Foreign Minister Sergey Lavrov ajuru

Dushanbe, Rongjui/ September 17 (Agencies): Dushanbe nung Shanghai Cooperation Organisation (SCO) Summit mapang India External Affairs Minister (EAM), Dr S Jaishankar-i Russia Foreign Minister, Sergey Lavrov ajurua jurila senden ka nung Afghanistan onük densema onük balala nung o lemtepogo.

20buba Shanghai Cooperation Organisation's (SCO's) Heads of State Summit nung adentsü atema Jaishankar Tajikistan-i oa lir.

Tena ajurutepeba sülen Dr. S. Jaishankar-i twitter ajanga, "Russia FM Sergey Lavrov mapang shia jangratema ajurur. SCO senden metenzükdang pa den Afghanistan onük densema tawa-tanü tatalokba onük aika nung o lemtepogo," ta metetdaksü.

Hokolbar anepdang Jaishankar-i China Foreign Minister, Wang Yi-a ajurua liasü. Wang den senden amendang Jaishankar-i,

Eastern Ladakh kübok Line of Actual Control (LAC) nung yimjung aser tesünep alitsü atema linük ana tsüngda tanüngba mangatettep ken o ajak bentettsü nungdak, ta ashi.

21buba SCO Summit mapang jurila senden nungji India aser China lenir anapronglai linük anaprongla nungi sepai ketdangsertem aser yimtenren lenirtem tekaraba nung ano maneni ajurutepeba senden mena ken o jembitsü bangjemogo.

Brihostibarnüa Jaishankar-i Kyrgyz Foreign Minister Ruslan Kazakbaev ajurua liasü aser iba senden nungji linük ana tsüngda onük balala nung maneni amalitepa inyaksü bangjem.

"Kyrgyz Republic Foreign Minister, Ruslan Kazakbaev ajuruba atema pelar. Linük ana tsüngda terenlok asadangogo. Regional aser tanga onüktem nung maneni amalitepa inyaksü atema bangjemogo," ta Jaishankar-i twitter ajanga metetdaksü.



September 16, 2021 nü New Delhi nung Defence Offices Complex semzükba sentong nung adentsü atema Ato kilonser, Narendra Modi aruba noksa nung angur. Kasa noksa nung Union Defence Minister, Rajnath Singh-a angur.

Anogo 90 sülen China nunger astronauts asem alimai meyipa shilang



Xinhua News Agency ajanga sayaba noksa ka nung China nunger astronauts abelen nungi, Tang Hongbo, Nie Haisheng aser Liu Boming nungertemi Inner Mongolia Autonomous Region kübok Dongfeng landing site nungi teka ayiploksüba angur. China nunger par asem ya anünglak nung anogo 90 tashi amungba sülen Hokulbarnü alimai meyipa shilanga liasü.

Beijing, Rongjui/Sept. 17 (Agencies): China nunger astronauts asem anünglak nung par linük asoshi mapang talangtiba munger alimai meyipa shilangogo.

Par asem ya China indang space station nung aliba Tianhe module nung anogo 90 amung, koba alima nungi kilometer 380 shi pilar lir.

Par asem ya Brehostibarnü Shenzhou-12 crewed spacecraft nung amen aser space station nungi apusoa liasü.

Iba mission takok anguba ya ajanga anünglak nung China nunger temolung ulushiba aser tashi itshiba sayur.

Nie Haisheng, Liu Boming

asertang Honbo nungertem ya Inner Mongolia nung aliba Gobi lisemlima nung Hokulbarnü 1:35 ako (par mapang) meta alua kongshi.

Parnok ya June 17 nü anünglaki kasa lisemlima nungi ayamesoa liasü.

Anünglak nung aliba mapang par asemi maparen balala inyaka liasü, aser item rongung alimai experiment data yokba, anünglak nung ghonda aika jajaba dena lir, ta China indang Global Times ajanga ashi.

Astronauts tem aliba space station indang core module ya astronauts shia atema talitsü tesem balala lir, space gym ka nung alakteta yanglyba

treadmill aser bicycle lir, ta China indang Aerospace Science and Industry Corp ajanga Global Times dang ashi.

China-i anünglak nung par inyakyim tsütsü tang kanga renloka arur. Ita lima tatem küleni robotic rover ka 2019 küm yokteta China ya mezüngbuba akum.

Ajisüaka par meyong space station yanglutsüsa akum, kechiaser International Space Station project nung parnok maden.

ISS nungya US-i anir Russia, Europe, Canada aser Japan lir, aser parnoki China den anünglak nung amalitepba mali.

Myanmar mitkartemi Suu Kyi anema ken o tasen benoktsü

Naypyidaw, Rongjui/Sept. 17 (Agencies): Myanmar mitkartemi lenir menden nungi atsüngdoker alila Aung San Suu Kyi anema ochimashi ken o benoktsü, ta lar okatsürtemi Hokulbarnü ashi, anungji tang ken o tejembidak aliba nung ano talila bendenloksema la küm aika tepuokdak alitsü akok.

February ita mitkartemi Suu Kyi aser election ajanga shimtetba lar sorkar atsüngdokba sülen la ya tang tashi house arrest nung lir, aser iba mechi ya linük tesem ajungalen mitkar anema nokdaka azüdokshia arur.

Arishi küm 76 tain Nobel Peace sempet ngur alila ya taoba küm lar teloki akoba election nübuyim mapang coronavirus tenokdangba nung aibelenba, ozüng alema bendang lima nungi walkie talkie bener arua amshiba aser yimsüsür anema nokdaksü ajungmesoa o jembiba nung tai tonglokja ken o jembia arur.

October 1 nungi tenzüka linük yimtiba, Naypyidaw nung la anema ochimashi mapa inyakba ken o tasen pezü benoka jembitsü, ta lar okatsür Khin Maung Zaw-i ashi.

Item ochimashi mapa inyakba ken o shia temerenshi küm 15 tepuokdak ayutsü.

Tang la anema ken o tejembidak aliba ya Myanmar nung coronavirus tensa

tamajungba akumba ajanga ita ana menutsüsa akum aser tan hopta nungi ken o jembi tenzüka mezüng anogo nung Suu Kyi temang majungba yong shilem magitet.

Tang tashi la anema okadak ken o jembiba nung osangbener metendaktsür.

Lai ozüng alema hon agizükba aser colonial-era secrecy law nung aibelenba atema mitkar yimsüsürtemi ken o benoka lir, saka item yabo ano court nung jembi metenzük.

2020 general election nung vote agütsürtemi ashikülak mapa inyak ta tai tonglokja mitkartemi lar National League for Democracy sorkar atsüngdok.

Linük ajunga nung mitkartem anema nokdakba aser tang tashi anisüngzük maliba yong iba linük rongsenketzüng marakzüi lir.

Mitkartemi sorkar atsüngdokba sülen azüdoshi nung nisung 1,100 dak tema tepsetogo aser nisung 8,000 shi pua lir, ta Myanmar tensa asadanga telok kati ashir.

Saka mitkartemi asü-amar ya kanga agi tajemba lir, ta ashir. Mitkartemi tashiyim amshia sorkar atsüngdokba mapang election ya küm ka tsüngta agitsü sangdonga liasü, saka taoba ita mitkar lenir Min Aung Hlaing-i 2023 küm August ita tashinung election agia state of emergency agientsü, ta ashi.

Cuba nung tanur nem COVID-19 vaccine agütsü tenzükgogo

Havana, Rongjui/Sept. 17 (Agencies): Cuba nung arishi küm ana nungi ter tsünga tanurtem nem COVID-19 mozü agütsüba maparen Brehostibarnü tenzüka alima nung iba mera agir linük mezüngbuba kumogo. Cuba nung yangluba mozü ya tanurtem asoshi timtem mali ta bushitet, ta health kettangtsürtemi ashi.

"Tanur dak mozü agitsüba mapang timtem majurura aser COVID-19 tashidak den raratsü tajung ta kuli ngutetra linük nung kinü tanurtema agidaktsütsü," ta Vedado Polyclinic University nung director Aurolis Otano-i osangbener dang ashi.

Delta variant prokshiba ajanga tanurtem dak iba tashidak tali menar, anungji Cuba nung scientist temi vaccine ya clinical trial nung tendang aser tanurtem agitsü mela, ta Otano-i ashi.

Polyclinic nung arishi küm ana nungi pongu tsüngta tanur 300 shi COVID-19 mozü ya agitsü imlar. Arishi küm pongu nungi ter tsüngta tanurtem dose mezüngbuba ya parnok azüngba school nung agitsür.

Taoba hopta Cuba nunger arishi küm 11 aser 18 tsüngta alirtem iba mozü ya agi tenzüka liasü. Parnoki Soberana 02 vaccine dose ana aser Soberana Plus dose ka agitsütsü

sentong lir, koba nisung taintem dak kasaji agija liasü.

Cuba nung COVID-19 tashidak menatempa aoba manener aser healthcare system tera agi melao.

Matanzas, Ciego de Avila aser Cienfuegos amala province tem nungbo linük tesem balala nungi doctor tem arua yari aser linük balala nungi tenla agüja liasü.

Soberanas den ano Cuba-i Abdala mozü yangluteta lir. Cuba indang Ministry of Health ajanga ashiba agi, par linük nung tang tashinung COVID-19 positive cases 776,125 aser tasüba nisung 6,601 lir.

June ita China kettangtsüri tanur arishi küm asem nungi 17

tsüngta nem Sinovac aser Sinopharm mozü agütsütsü mela liasü. United States aser European linük aika nung tanur arishi küm 12 nungi tema nem COVID-19 mozü agidaktsür.

Tashidak wara tamajungba nungi tanurtem jembu aser virus menaba mapang parnok temang nung timtem ajema liasü. Saka virus ya tanurtemi dangar dak menaloktsütsü, ta mongintemi ashi.

"Taintem timba COVID-19 vaccine agir asünung, linük timba nung tanurtem shirnok vaccine agitsü metemsü lir, parnok mozü kidangi aor aser asür timba lir," ta Pan American Health Organization nung director Carissa F Etienne-i ashi.

South Africa court-i Zuma temerenshi memelenshitsu

Johannesburg, Rongjui/Sept. 17 (Agencies): Ochimashi mapa inyakba bushisüngdangba nung taoba Tir Jacob Zuma madenbayong ita 15 tepuokdak ayutsü obendang agütsüba temerenshi memelenshitsu, ta South Africa indang tematiba court ajanga ashi.

Zuma-i küm 9 linük yimsü asüba mapang ochimashi mapa inyakba ken o bushisüngdang matsüngdang June ita pai kuli magütsütsü mechi iba temerenshi ya agütsü, koba South Africa nung kin dak ajemdaker mapa tamajung inyakba mapang tashi tait

yimten yimsüsür asoshia ozüng ya ali asü mali ta tendangba ka amai lir.

Zuma ya shingaia memetetba tashidak ka asoshi surgery agiba sülen tang mozü kidang temang anepalua munga lir, aser July ita court dang pa nem temerenshi agüja aliba ya aibelen dak alia asünung agientsüla aser tepuokdak ayuba ajanga pa temang lendongi yoktsü, ta shia liasü.

Ajisüaka Constitutional Court nung züngsem timbai Hokulbarnü telemtetba agia pai benokba ken o magizük.

(Maneni tapak 9 nung...)



Bangkok, Thailand nung mamshi yua aliba taxi kilem-kolak nung taxi cooperatives ana nungi mapa inyakerteri atsüki tila yangluba noksa ka yangi angur. Coronavirus tashidak wara mechi taxi tem mamshi yua aliba amshia aser driver tem mapa maliba awareness agüja Thailand nung aliba taxi kilem-kolak nung atsüki yanglua amshir.

Peren jila nung Coffee Hill Top lapoktsüogo



Peren, Rongjui/September 17, 2021 (TYO): India nüjiso ngur küm 75 ajungba nungtem (Azadi ka Amrit Mahotsav) nung, Peren Town kübok Coffee Hill Top lapoktsüogo, ta sangdong ajanga metetdaksü.

Hokolbarnü (17.09.2021), Land Resources Development, Government kübok, entrepreneur atema ADC, Mhathung Tsanglao, NCS-i Coffee Hill Top semzükja liasü.

Coffee tsünütsü aser yanglutsü asoshi local entrepreneur tem ajungmesotsü aser training agütsütsü nükjidong nung iba mapatong takok ngua inyakba atema, Mhathung Tsanglao-i Land Resources Department dang pelaba metetdaksü.

ADC-i ashiba agi, India

amala linük ka nung, nüburtemi süngo aser coffee bulua ajemer. Social media talisa Facebook aser Twitter ajanga entrepreneur temi inyaketba maparen alima dang metetdaksütsü aser sayutsü asoshi lenmang lir, ta Tsanglao-i shisem.

Peren LRD, DPO, Alemla Aier-i, 1980s mapang Nagaland nung coffee programme tenzükba tongmelang agi metetdaksü, kong Coffee Board of India den Nagaland Plantation Crops Development Corporation (NPCDC) tentet ajanga ajungmesoa coffee tsünütsü tenzük, ta lai ashi.

2015 küm Nagaland Sorkari iba wadang tanaben asentenshidaksü aser 2016 küm ali aser tzu mopung tapet nung coffee tsünütsü aser iba

maparen ajungkettsütsü asoshi Department of Land Resources ya nodal ama shima liasü, ta lai ashi.

Alemla-i, Noble Cause Coffee Company, Cape Town, South Africa den küm 30 atema Department-i MoU ka sign süogo. 2030 küm tashi nungbo, ali hectare 50000 shi nung coffee tsünütsü Department nükla lir, ta lai ashi.

Coffee Hill Top lapokba sentong nung, Additional Superintendent of Police, Peren aser NGOs balala densema sorkar ketdangsürtem aruagi denogo. Maneni, sentong nung, coffee atema machine tem semzüktsüba den, lisopurtemi yangluba coffee balala sayua aser telok sensaksem kaogo, ta kasa sangdong nung shia lir.

Peren nung district level workshop agi

Peren, Rongjui/September 17, 2021 (TYO): Sustainable Development Goals (SDGs) mapatong tejakleni bener aotsü nükjidong nung, SDG Coordination Centre, Planning & Coordination Department, Govt. of Nagaland-i Bresthibarnü, DC.Conference Hall, Peren nung District level workshop ka ayongzük, ta sangdong ajanga metetdaksü.

Iba workshop sentong tenzük, Deputy Commissioner Peren, Sentiwapang Aier, NCS-i, 2030 küm tashi nung, meimchir rongnung sensakertem, tangar libaliro jenjang memenepi alir timtem samatsütsü/pungbadaksütsü, lipuküm/libajen kümzükka ayutsü aser meimchir ajak tesünap aser yimji-yimjung nung lidaksütsü nükjidong yur, 2015 küm United Nations Member State ajaki SDGs agizükka liasü, ta ashi.

Mezüng technical session nung, SDG Officer, Abilo Humtsoe-i, SDGCC Nagaland indang tongmelang agi metetdaksü, kong meimchir asoshi tarutsü tajungba ajangzüktsü atema SDGs nung alima ajunga asoshi nükjidong 17 dena lir aser iba den külemi nükjidong 169 shi sendaktepa aser 'indicators' 232 shi yanglua lir, ta lai ashi.

Iba dak sendakba nung tesayuba agütsütsü, SDG asadangshitsü, asalentongtem akangshidaksütsü aser State tesem ajunga nung SDG mapa kuma inyaksü ajungshitsü atema Planning & Coordination Department, Government of Nagaland indang SDGCC tenzükka liasü, ta lai ashi.

Abilo-i powerpoint presentation ajanga, Peren District nung rangloker Nagaland nung SDG agizüktsü

asor longjemdaksütsü indang nung ajemdaker jembia liasü. Iba den külemi Nagaland SDG Vision 2030' indang video ka sayu, SDGs nükjidong ataloktsü asoshi National jenjang nung renemshiba den State level nung asalentong yanglutsü, State aser District level institutional mechanism, District SDG monitoring framework den Nagaland aser Peren indang NER District SDG index-Overall performance onük nung lai jembio.

Maneni, sentong temer sülen, SDG Consultant ajanga sensaksem sentong ka agia liasü, kong tayongzükba balala ajuruba jangjatetsü aser iba timtem bushitettsü; aser item timtem dak sendakba nung telemtetba agitsü asoshi asalentongtem yanglutsü atema telok jembio, ta kasa sangdong nung shia lir.



Kohima, Rongjui/September 17, 2021: Hokolbarnü, Administrative Office, Jorhat, Assistant Manager (Financial inclusion), Rajneesh Kumar-i State Bank of India Customer Service Point (CSP) Kezieke, Kohima semdanga liasü. Jansuraksha Campaign kübok APY, PMSBY aser PMJJBY atema Social Security Scheme (SSS) dak sendakba nung Kumar-i iba CSP semdang. Sangdong ajanga angazükba agi, SBI Saving Account holder temi enrollment atema aser iba scheme indang tajangzüktem agitsü asoshi CSP semdangtsü akok. CSP Operators Neike Theyo aser Wabang Jamir na den customer tem külemi tangokba noksa ka yangi angur.

MENUNGRA BILEMTETER

Onoki kodanga amadoktsü makokba ozü obala asür **Lemdongnukshi Longkumer**, Changtongya, akümüli toktsür küm ka (1) abensaba anogo **18.09.2021** nung pa akümüli wadang ozü nüklai arua menungraseta Tsüngrem nem tenüngsang agüja sarasadema amonger.



Temeim kinungtsü, jabaso, jala, tsürabur aser kinungertem.

Office of the

Nokpu Village Council

P.O. Mangkolemba, B.P.O Longchem
Dist. Mokokchung, Nagaland

TEPELA SANGDONGER

Asen Aor Yimkong len anitsü sempet ajiteta, Ao senden Tir Wb. Chubawati Longchar aser pa den külem tenzükertem ajak nem Aolisangeri maongka tulu agüja, parnok mapa nung tanaben shimshiba atema Nokpu Medemchanger Putu menden aser sensosanger ajaki kanga pelaba sangdonger.

Tsüngremi pa taküm aser pa den külem tenzükertem ajak asen lima asoshi moajangma.

Sd/-

**T. Lanusosang, Chairman
Nokpu Village Council**

Wokha DC ajanga metetdaksür

Wokha, Rongjui/September 17, 2021 (TYO): Deputy Commissioner aser Chairman District Task Force for COVID-19 Wokha, Orenthung Lotha-i sangdong ka ajanga, Home Department ajanga agütsüba tetuyuba nung anidaka, Wokha District kübok tang tagidak aliba lockdown meratem nung maneni anidakba den teküboklen agüja aliba ama talenba kar salaja aser maparentem September 17 nungi tenzükka September 30, 2021 tashi lapoktsür, ta metetdaksü.

1. Covid-19 dak sendakba mera tapet nung anidaka aser office-i arutsü atema vaccine agitsü/COVID-19 tendangtsü tetuyubatem nung anidaka Sorkar office tem 100% attendance nung lapoktsü melar.

2. District kübok yimdak-yimtsüngtem nung akhi ama class ya Class V nungi Class X tashi attendance shilem 50 tashi lapoktsü aser Home Department ajanga sangdongba SOP ajak amshitsüla.

3. District kübok urban area nung aliba school ajunga Class V nungi Class X tashi azünger

kaketshir atema akhi ama class October 1, 2021 nungi tenzüktsü, saka attendance shilem 50 dang asütsüla aser Home Department ajanga sangdongba SOP ajak amshitsü.

4. District kübok dokan/shishilembaba tesem ajak akhi ama anogoshia anepdang 05:00 ako nungi nikongdang 08:00 ako tashi lapoktsü melar.

5. Aonung Curfew ghonda aonung 09:00 ako nungi anepdang 04:00 ako tashi alitsü.

6. Swimming pools aser cinema tem lapoktsü melar saka capacity shilem 50 dang melar aser Home Department ajanga sangdongba SOP tem shidak amshitsü aser COVID-19 tashidak nungi jenbua alitsü meratem amshitsüla.

Item tetuyuba nung aibelenba kar danga lira, itemji Indian Penal Code indang Section 188 aser Disaster Management Act, 2005 kübok aibelenba ama züngshitsü aser tapet temerenshi agütsütsü, ta Deputy Commissioner aser Chairman District Task Force for COVID-19 Wokha, Orenthung Lotha-i sangdong ajanga metetdaksü.

South Africa court-i Zuma temerenshi... (Tapak 8 nungi...)

Ibai tang yimsü tesüdak African National Congress nungi arishi küm 79 tain yimten yimsüsür tejen asoshi tzüzüng-ozüng tsütsü tetsükdaksü ajuruba rongnung tasenba alitsü, shibai 2009 aser 2018 tsüngta yimsü asüba mapang ochimashi mapa kanga inyak ta aija liasü. Saka paibo aibelen mapa meinyak, ta ashir.

July ita Zuma tepuokdak ayutsü obendang agütsüba sülen South Africa nung azüdokshia rongrong-shirong tenzük, ki-o-jen raksatsü, nisung 300 dak tema tepset aser rongsenketzüng tsütsü kanga akoksa liasü.

Pa melenzüksang Cyril Ramaphosa-i iba rongrongshirong ya linük raksatsütsü meranga nisung kari inyakdaksüba lir, ta ashi aser

rongrong ayonger pua merenshitsü nangzük.

Iba azüdokshia nungya Black communities timba sür alirtem jashiba dena lir, shirnok 1994 küm South Africa nung democratic election mezüngbuba agiba nung ANC teloki takok nguaka tang tashi jenjang tamajung nung alir.

1999 küm Zuma ya deputy president inyakba mapang European arms firm pongu nungi fighter jets, patrol boats aser osettsüset balala aliba nung ashikülak aser ochimashi mapa inyakba ken o 16 tashi pa anema benoka lir.

Pa ya France nung aliba defence giant, Thales nungi süpokrem agi, ta tai tonglokja lir, koba ochimashi aser tim masüba nung senotsü amshiba asoshi ken o benoka lir.

National Boxing Championships: Sachin-i Gaurav tsükdaktsü

Bellary, Rongjui/September 17, 2021 (Agencies): Hokolbarnü, Bellary kübok ayongba National Boxing Championships - tebur 57kg category mezüing round tetoktepba nung, Haryana nungi Sachin-i taoba mapang world championship bronze medal angur Gaurav Bidhuri tsükdaktsü.

Tebur 57kg category asaya nung, Sachin-i Bidhuri madak 4-1 agi takok angu.

Kasa asayamung tebur category tanga ka nung, Haryana pugilist aser South

Asian Games champion, Ankit Khatana-i Himachal Pradesh nunger Dharm Pal tsükdaktsüba sülen, 75kg quarter-final-i iogo.

Telangana nunger Savio Dominic Michael (54kg) aser Goa nungi Ashok Patil (67kg) naprongla pei pei tata asaya nung point kasa shi - 4-1 agi takok anguba sülen, tenaprongla quarter final tongogo.

Savio-i Jharkhand nunger Krishna Jora aser Ashok Patil-i Himachal Pradesh nunger Mohan Chander tsükdaktsü.

Iba asayamung tenzüker tasemnübuba tashi takok ngua asayar rongnung Chandigarh nungi Kuldeep Kumar (48kg) aser Sachin na denogo.

Kuldeep-i Rajasthan nunger Sushil Sahran madak 4-0 agi takok anguba sülen, pa quarter-final-i iogo.

75kg category nung, Maharashtra pugilist Nikhil Dubey-i maneni shilem tajung agia arur sülen, pa-a quarter-final tongogo. Last 16 bout tetoktepba nung, Nikhil-i Telangana nunger Venu Mandala madak takok angu.

Luxembourg Open: Sania aser Zhang na quarter-final nung tsük

Rongjui/September 17, 2021 (Agencies): Luxembourg Open asayamung tetsür tarep quarter final asaya nung, India tsür Sania Mirza aser China tsür Shuai Zhang na tsükogo. Brehostibarnü, iba asaya nung, Sania aser Zhang nati 3-6, 6-3, 10-8 agi Belgium tsür Greet Minnen aser Alison Van Uytvanck makok.

Iba asaya ghonda 1 ser minute 11 nung tembang. Sania Mirza-i trokben Grand Slam doubles kokdanga lir aser külem tarep Shuai Zhang-i tawa 2021 US Open nung Grand Slam title tanabuba takok angu. 2021 US Open tetsür tarep nung Zhang-i Australia tsür Samantha Stosur den asaya liasü.

Bodhbarnü, iba asayamung tetsür tarep round of 16 nung Sania Mirza aser Shuai Zhang nati Germany tsür Tayisiya aser Yana Morderger madak 6-3, 6-3 agi takok angu.

Quarter final nunga, Sania

asayamung Zhang nati junga asaya tenzüker aser mezüing set nung tenati ayong ayonga 6-3 agi Belgium tsür tarep tsükdaktsü. Iba set indang game trokbuba nung tenati break point ka angu.

Tanabuba set tenzüker, Sania aser Zhang nati mezüing game nung break point ka angu aser quarter final ama tenati set anaprongla atonga takok angutsü teimla liasü.

Ajisüaka, Greet Minnen aser Alison Van Uytvanck nati set tanabuba nung telanzüba tajung agüja asaya. Minnen aser Alison nati tanabuba aser pezübuba game nung break point ana tashi atonga angu; aser ibaji ajanga set tasembuba asayatsüsa kümamadok.

Asaya akoktsü teimla tulu nung, team anapronglai iba tie-breaker nung kanga toktepa asaya liasü aser team anaprongla point 7-7 shi meneptepa asaya. Iba mapang, Belgium tsür tarep yagi break

point ana agitsü asoshi maongka tajung angu.

Sania aser Zhang nati ano match point ka agia liasü, saka Minnen aser Alison nati 10-8 agi iba asaya koktet.

Luxembourg Open tetsür tarep final tongtettsü atema, semi-final nung Greet Minnen aser Alison Van Uytvanck nati seed tasembuba Japan tsür tarep Eri Hozumi aser Makoto Ninomiya na den asayatsü.

Taküm, Tokyo Olympics tennis asayamung tetsür kija mezüing round nung, arishi küm 34 tain Sania Mirza tamakok ngur külen nungi Cincinnati Open aser US Open asayamung anaprongla mezüing round nunga la tsükadok.

Ajisüaka, taoba ita Sania-i Cleveland Open final tongteta asaya liasü. Ajisüaka iba asayamung final nung Sania aser America tsür Christina McHale naprongla tamakok angu.

Junior Men's Hockey World Cup nung Australia masayatsü

Melbourne, Rongjui/September 17, 2021 (Agencies): Alima ajunga asüingba Covid-19 wara süshia maoba aser iba wara dak sendakba nung tekümdangtsü mera balala aliba yong, Australia-i aruya aliba Junior men's hockey World Cup aser FIH Pro League nung shilem magitsü lemtet.

India nung November nungi Junior men's hockey World Cup asayamung ayongzüktsü aser October 16 nungi Pro League tenzükttsü terenemba lir.

Hockey Australia-i, Tokyo Olympics nung silver medal angur Australia aser külem Trans-Tasman nungi New Zealand napronglai Pro League indang season 3 nung shilem magitsü, koba taruba ita nungi tenzüker.

"Covid-19 wara dak sendakba nung sorkar ajanga senzusenbongtsü tenokdanga agitsür aliba aser linük anaprongla nung iba tensa mejangjatetba yong, Australia aser New Zealand naprongla FIH Pro League indang Season

3 (October 2021 nungi tenzüka asayatsü) nung shilem magitsü," ta Hockey Australia-i sangdong ajanga metetdakttsü.

"Asayamung nung shilem agitsü team ajaki aser FIH Pro League Council anapronglai Australia aser New Zealand tashi international team den külemi linük anaprongla (Australia aser New Zealand) bendanglen oa asayatsü aser quarantine mesüi pei talidaki meyipa aotsü ya tamakoktsü bangjemtep," ta kasa sangdong nung shia lir.

Tang, Australia aser New Zealand nung Covid-19 temzüing takang latetta lir, koba ajanga tanga team anioka asayamung ayongzüktsü asoshi tamakoktsü akümer.

"Iba wara dak sendakba lendongbang aser Australia sorkar health tetuyuba asadanga, Hockey Australia-i tangba mapang hockey asayamung atema bendangleni aotsü mebiler," ta HA Acting CEO, Michael Johnston-i ashi.

Pro League aser India nung iba asayamung dak alaka,

Australia-i taküm küm tatemlen South Africa nung junior women's World Cup nunga shilem magitetsü. Iba den külemi Australia-isa Belgium nung Indoor World Cup aser 2022 küm USA nung Masters Indoor World Cup asayamung nung shilem magitsü.

HA High Performance Pathways Manager Ian Rutledge, shibai junior men's and women's World Cups nung Australia team shilem agitsü atema asalentongtem renema liasü, pai ashiba agi, "Tesüiba ita 18 tashi athlete tem, shirnok item World Cup nung shilem agia aser taruba Hockeyroos aser Kookaburras akümtsü asoshi renema liasü, parnoki tayongzükba jenti ajangshia aruogo."

"Hockey Australia indang teinyaktsü tongtibangtibaji tangba mapang athlete aser staff tem iba wara nungi kümzüka ayutsü asoshi inyaker aser iba telemtetba nung parnoki asayamung nung shilem magitetsüsa akümer," ta Ian-i shisem.

Men's Asian Champions Trophy asayamung atsülanger: BHF

New Delhi, Rongjui/September 17, 2021 (Agencies): October 2021 ita Dhaka yimti nung ayongtsü aliba men's Asian Champions trophy asayamung December nungang asayatsü, ta Hokolbarnü asayamung ayonger tentet Bangladesh Hockey Federation (BHF)-i osang jangjatsüogo.

"Asian Champions Trophy asayamung December 12, 2021 nü nungi tenzüka asayatsü," ta BHF-i sangdong ka ajanga metetdakttsü.

Bangladesh nung Covid-19 tensa süngjema küma maoba aser senzusenbongtsü nokdanga den quarantine temzüing takang, koba international team temeyoktep atema maparen tezüba masü, item

mepetmesü ajanga iba asayamung atsülanger lemtet.

Iba asayamung dak sendakba nung Asian Hockey Federation CEO, Tayyab Ikram den aiben ola osang agitsü merandang, saka pai telanzüba ka magitsü.

Men's Asian Champions Trophy asayamung October 1 nungi 9, 2021 tashi ayonga asayatsü sentong renemer liasü.

Kasa timtem ajanga, Women's Asian Champions Trophy asayamung anogo atsülanger. Ajisüaka, iba asayamung tenzükshtsü asoshi tentet ajanga ano osang magitsü.

Donghae, South Korea nung October 24 nungi 31, 2021 tashi tetsür hockey asayamung ayonga asayatsü renemer liasü.

Union MoS Chadraxekhar... (Tapak 1 nungi...)

Nagaland sorkari taruba küm ana tsüingda Union Ministry den yaritepa IT aser ITeS dak sendakba mapa 5000 adokdakttsü alizüing lir, ta paisa metetdakttsü.

COVID-19 tensa ajanga STPI, IT Department-i ecosystem ka yanglutsü aser iba nung Nagaland kinük ajaklen internet angutsü ta Mmhonlumo-isa ashi.

"Nagaland nung e-Governance aser ICT based technologies amshiba ajanga jenjang tajungba kümdakttsütsü mapangji tang ya lir" ta Principal Secretary to Chief Minister, IT&C and Power, Nagaland, K. D. Vizo-ia ashi.

"Department of IT&C indang nükjidong tongtipangbaji South East Asian Region nung Nagaland ya major software exporter ka kümdakttsütsüba lir. IT aser e-Governance maparen nung lanurtem aniokba ajanga India nung state takartem rongnung ka kümdakttsütsü alizüing lir" ta paisa ashi.

"Union MoS-i Nagaland semdangba ajanga mapang tatsüka tsüingda SouthEast Asia

nung Nagaland ya IT hub ka akümtsü alizüing atongtsü imlar" ta K. D. Vizo-isa metetdakttsü.

SOFTWARE TECHNOLOGY PARKS OF INDIA (STPI):

Software Technology Parks of India (STPI) ya Indian Ministry of Electronics and Information Technology-i 1991 küm tenzüka lir.

Iba mapang nungi tenzüker tang tashi nung India nung STPI centre 60 tashi lapokogo.

STPI ajanga IT/ITES industry, innovation, R&D, start-ups, product/IP creation in the field of emerging technologies like IoT, Blockchain, Artificial Intelligence (AI), Machine Learning (ML), Computer Vision, Robotics and Robotics Process Automation (RPA) ajungketer.

STPI-isa Augmented & Virtual Reality, Animation & Visual effect, Data Science & Analytics for various domains like Gaming, FinTech, Agritech, MedTech, Autonomous Connected Electric & Shared(ACES) Mobility, ESDM, Cyber Security, Industry 4.0, Drone, Efficiency Augmentation, amala ajungketer.

Prof Jagdish Mukhi-i... (Tapak 1 nungi...)

Iba mapa ya Tsüingremi kü nem moatsüba ta ni züingshir aser akokba tashi ni bendanga agüja inyaktsü nangzüker" ta paisa metetdakttsü.

Nagaland ya Indian linük nung shilem ka lir aser Naga maitsü ajanga temeyoktep nung telongjem aliba kuli sayur, ta paisa ashi.

"Nagaland nungi products kar GI Tag anguba osang angashia ni kanga pelar. Asenok ajak longjemer India nung Nagaland ya sobaliba tongti tesem ka aser tourist temi semdangnüba lima ka kümdakttsüdi" ta Prof Jagdish Mukhi-isa metetdakttsü.

"Prime Minister Narendra Modi lenisüba kübok India

tejakleni aoer. Pa indang Atmanirbhar aser Shashakt Bharat alizüingtem ajanga welfare policies aser schemes tajungba kümdakttsüogo. Pa lenisüba kübok Naga yimten tebilemtsü indang maparen tajungba kümogo aser kobi melii Naga nungeri aginüba ama telemtetba ka agitsü ni amanger" ta paisa metetdakttsü.

"Nagaland nung alirtem aser talisa lanurtem dang saksalemtsü aser Nagaland renlokba nung shilem agitsü ayongzüker. India linük nung Nagaland ya Eastern Star ka ama prangshitsü atema asenoki merangdi" ta Nagaland Governor Prof Jagdish Mukhi-isa ashi.

BILEMDANGANG

"Tesüingjem molungsentsü agi alizüing tongteteter."